

VENDIM
Nr.225, datë 7.4.2010

PËR DISA NDRYSHIME NË VENDIMIN NR.427, DATË 4.8.2000 TË KËSHILLIT TË
MINISTRAVE “PËR KRIJIMIN E AGJENCISË SË ZHVILLIMIT TË ZONAVE
MALORE”, TË NDRYSHUAR

Në mbështetje të nenit 100 të Kushtetutës, të ligjit nr.9605, datë 11.9.2006 “Për ratifikimin e marrëveshjes së huasë, ndërmjet Republikës së Shqipërisë dhe Fondit Ndërkombëtar për Zhvillimin Bujqësor (IFAD), për financimin e programit për zhvillimin e qëndrueshëm të zonave rurale malore” dhe të ligjit nr.10 079, datë 23.2.2009 “Për ratifikimin e marrëveshjes së financimit, ndërmjet Republikës së Shqipërisë dhe Fondit Ndërkombëtar për Zhvillimin Bujqësor (IFAD), për financimin e programit “Malet drejt tregut”, me propozimin e Kryeministrit, Këshilli i Ministrave

VENDOSI:

1. Në statutin, që i bashkëlidhet vendimit nr.427, datë 4.8.2000 të Këshillit të Ministrave, të ndryshuar, bëhen këto ndryshime:

a) Neni 9 ndryshohet, si më poshtë vijon:

“Neni 9

Organet drejtuese të AZHZM-së janë:

- a) Bordi ekzekutiv;
- b) Komiteti ekzekutiv;
- c) Drejtori ekzekutiv.”.

b) Neni 10 ndryshohet, si më poshtë vijon:

“Neni 10

Bordi ekzekutiv është organi më i lartë vendimmarrës i AZHZM-së, i cili kryesohet nga ministri përgjegjës për bujqësinë dhe zhvillimin rural dhe nga 10 anëtarë, si më poshtë vijon:

1) 4 (katër) anëtarë, përfaqësues të institucioneve qendrore, në nivel drejtor i përgjithshëm ose drejtor drejtorie, nga një për secilën ministri përgjegjëse për: (a) financat; (b) ekonominë; (c) çështjet sociale dhe shanset e barabarta; dhe (d) çështje të pushtetit vendor. Emërimi dhe shkarkimi i tyre bëhen nga kryetari i bordit, me propozimin e ministrit përkatës. Kandidatët për anëtarë caktohen nga strukturat që kanë lidhje bashkëpunimi ose bashkërendimi me veprimtarinë e kësaj Agjencie.

2) 2 (dy) anëtarë përfaqësues të organeve vendore, nga të cilët një përfaqësues i shoqatës së këshillave të qarqeve dhe një përfaqësues i shoqatës së komunave. Emërimi dhe shkarkimi i tyre bëhen nga kryetari i bordit, me propozimin e shoqatave përkatëse. Kandidatët e propozuar nga shoqatat duhet të jenë të zgjedhur të pushtetit vendor (kryetar qarku, komune ose anëtar këshillash), në qarqet dhe komunat që kanë lidhje bashkëpunimi ose bashkërendimi me veprimtarinë e kësaj Agjencie.

3) 4 (katër) anëtarë, përfaqësues të sektorit privat, nga të cilët:

a) 1 (një) nga Shoqata e Bankierëve, i emëruar nga kryetari i bordit, me propozim të saj.

b) 1 (një) nga Këshilli i Agrobiznesit Shqiptar, i cili emërohet nga kryetari i bordit, ndërmjet tri kandidatave të propozuara nga KASH-i. Kandidatët e propozuar duhet të jenë drejtues kryesorë të shoqatave të prodhuesve, të përpunuesve apo të tregtarëve në zonat e veprimit të Agjencisë.

c) 1 (një) nga shoqatat e grave, i cili emërohet nga kryetari i bordit, ndërmjet tri kandidaturave të propozuara nga shoqatat e grave, që veprojnë në zonat e veprimtarisë së Agjencisë. Kandidatet e propozuara duhet të jenë drejtuese kryesore të shoqatave të grave që merren me prodhim, përpunim apo tregtimin e produkteve agro-ushqimore në zonat e veprimit të Agjencisë;

ç) 1 (një) nga Forumi Kombëtar i Zonave Malore, i cili emërohet nga kryetari i bordit, ndërmjet tri kandidaturave të propozuara nga forumi kombëtar. Kandidatët e propozuar duhet të jenë drejtues kryesorë të Forumit Kombëtar të Zonave Malore ose të forumeve lokale që janë anëtare të Forumit Kombëtar, në zonat e veprimit të Agjencisë.

Afati i qëndrimit në detyrën e anëtarit të bordit ekzekutiv të AZHZM-së është i papërcaktuar, me përjashtim të përfaqësuesve të pushtetit vendor, afati i të cilëve është i njëjtë me mandatin e tyre si të zgjedhur të pushtetit vendor.

Titullari i institucionit të përfaqësuar në bord ka të drejtë të propozojë, në çdo kohë, lirimin nga detyra të anëtarit që e përfaqëson dhe të propozojë zëvendësimin e tij, sipas procedurave të përcaktuara më sipër. Kryetari i bordit ekzekutiv, pasi e vlerëson të motivuar propozimin, bën lirimin dhe emërimin e kandidatit të propozuar.

Kur një anëtar i bordit nuk merr pjesë, pa arsye objektive, në tri mbledhje të njëpasnjëshme, shkarkohet nga kjo detyrë nga kryetari i bordit, i cili i kërkon institucionit të përfaqësuar fillimin e procedurës së zëvendësimit të tij me një përfaqësues tjetër.”.

2. Veprimtaria e bordit ekzistues përfundon me hyrjen në fuqi të këtij vendimi dhe, brenda 5 (pesë) ditëve, nga hyrja në fuqi e këtij vendimi të fillojnë procedurat për formimin e bordit ekzekutiv të ri, sipas përbërjes së miratuar.

3. Ngarkohet bordi ekzekutiv i Agjencisë, që, brenda 3 (tri) muajve nga data e hyrjes në fuqi të këtij vendimi, të rishikojë dhe të bëjë propozimet për ndryshimet e nevojshme në statutin e Agjencisë, për t'i përshtatur ato më mirë me nevojat e perspektivat e funksionimit dhe të zhvillimit të këtij institucioni, sipas standardeve ndërkombëtare, bashkëkohore, për mbështetjen e zonave malore dhe të zonave më pak të zhvilluara.

4. Ngarkohen Ministri i Bujqësisë, Ushqimit dhe Mbrojtjes së Konsumatorit, Ministri i Financave, Ministri i Ekonomisë, Tregtisë dhe Energjetikës, Ministri i Punës, Çështjeve Sociale dhe Shanseve të Barabarta, Ministri i Brendshëm dhe Agjencia e Zhvillimit të Zonave Malore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha